



Kamis, 26 Mei 2022

Ogen: Kuan-kuanen 26:28



Cakap Manis



\\ Dilah e la ertulan, kai pe banci ibelasi, kai pe banci ijanjiken” Ranan enda enggo semal kel bas masyarakatta. Adi siperdiateken bas dahin pesta demokrasi maka melala kel singatakenca enggo medu meggi janji-janji pehuliken kuta ras sidebanna. Pengalamen si jadi lalap terulang seh maka lanai meherga tempa janji-janji si ni belasken nina “janji tinggal janji.” La nepati janji e erbahanca kalak simegiken janji e ngejapken ibuali dengen lanai tek. Dungna lanai siteken sada ras sidebanna (krisis kepercayaan).

Cakap banci manis tapi tindakan nyata nge siperluna. Ngonggar janji seri kap ras erbual. Tupung si buali kalak e banci peturah luka pusuh, nembah ate. Piga-piga kali ibuali erbahanca turah luka bas pusuh seh maka mesera ka kel mulihi ngaloken janji-janji si mbaru. Piga-piga kali terbelas anak-anak man orang tua nina “kam janji ngenca lalap” kata enda nuriken maka la lit ertina erjanji adi la isehi. Kalak sierjanji bali ras cakap manis. Cakap manis, entabeh terjeng man beginken, tersehi lalap lang. Melala kel alat si ni ipake guna erbual enda. Umpaman; iteleponi kalak kita nungkun enggo ja kita seh, si jabap me la sentudu ras inganta situhu-tuhuna (ninta bas ukurta segelah ula jadi persoalen), sidebanna arah dunia maya enda, sibereken komentar janji janji si labo isehken kita; kune lit status kalak sakit si idah ninta, sibaba bas toto padahal labo pernah sitotoken. Kalak si bage maba cilaka nina kitab kuan-kuanen.

Wari enda Moria, iajuk segelah ngasup min ertimbang lebe alu mbages sope erjanji. Ergana janji sinibelasken e inilai arah nepatisa, e maka adi enggo kita erjanji asa gegeh ras ngasup lit sehkenlah. La erpilihan subuk man kalak dewasa entah man anak-anak. Banci si akap adi anak-anak langa bo melala pemetehna, entah man kalak sienggo dewasa kerinana sehkenlah janji sinibelasken kita. Ula min sempat kita terkuan terjeng cakap manis saja. Jadilah Moria si cakap manis bas ngerana, tegas nehi cakap e alu tindakan nyata.